

M. Scott Peck, for di su buki “In Search of Stones”:

“E habilidad di percibi lo mistico den lo ordinario ta un don”

ORANJESTAD - Biblioteca Nacional Aruba actualmente tin den su sala di actividad e exposicion hopi bon bishita, “Mystique”, di e artista local Gyzah.

Gyzah ta nomber artistico di Gwendy Sneek, kende a nace na Aruba. “Mystique” ta e resultado di estudio y experiencia di e artista local aki, basa riba varios disciplina cu el’a haci den transcurso di su bida, por ehempel cura natural cu energia, energia di piedra precioso y aplicacion di esaki na diferente manera, aromaterapia, alfa brainwave control etc. Despues di a caba Colegio Arubano aki na Aruba y a traha diferente caminda, Gyzah a haci diferente estudio- y cursonan na Hulanda y tambe Brasil, manera Natuurgeneeswijzen en Intuitieve Ontwikkeling: Alfa I, Alfa II y Aromatherapie I; Pintura riba seda, lesnan priva di Sra. Aida Azula; cursonan na ‘Atelier Ramalho, Café des Artistes’ na Rio de Janeiro.

Mystique ta mas cu djis un



coleccion di arte, e ta un viahe mistico/spiritual cu ta crusa frontera. ‘Mystique’ ta hiba bo Tibet, Mexico, Brasil, etc. Titulonan manera ‘Gateway to the heavens’, ‘Ora Ubao’, ‘Forgotten roots’, ‘The sixth element’, etc. ta ‘mind-openers’.

Na mes momento tambe ‘Mystique’ ta trece nos bek serca nos mes tocando nos alma, uniendo nos cu nos propio

spiritualidad. E beyesa di e trabou di Gyzah ta resalta mas ainda ora bo realisa bo mes cu lo mistico ta un abstracto denter di un abstracto. Usando como medium acrilic y poniendo aserca su conocemento y experiencia riba tereno spiritual, e artista ta logra haci e mundo mistico visibel pa wowonan mundano. Combinando esaki cu 2 poema di su propio persona, esaki ta crea un interaccion interesante den mente di e observador/bishitante.

Gyzah ta laga sa di ta hopi contento cu e oportunidad brinda pa Biblioteca Nacional Aruba cu ta facilita acceso na arte pa grandi y chikito y specialmente pa cu su trabou.

Biblioteca ta invita un y tur pa bin experiencia un ‘momento mistico’. ‘Mystique’ ta den sala di actividad di biblioteca te dia 23 di juni 2006, tur dia for di 10’or di mainta en adelante. E artista ta presente pa duna mas splicacion si ta desea esaki.